

四庫全書

史部

欽定四庫全書

史部

唐大詔令集卷

八十四

詳校官編修臣范來宗

編修臣裴謙覆勘

總校官編修臣倉聖脉

校對官助教臣羅萬選

謄錄監生臣劉家瑛

欽定四庫全書

唐大詔令集卷八十

宋 宋敏求 編

典禮

朝賀

冬至取次日朝賀勅

五月一日御宣政殿勅

淮西用兵罷元會勅

貢獻

停貢獻詔

罷正至進奉詔

宴集

定州賜宗姓老人宴會

賜百官錢令逐勝宴集勅

宴朔方將士勅

宴幽州老人勅

平淮西後宴賞諸軍將士放歸本道詔

以水災罷九日宴會勅

養老

賜孝義高年粟帛詔

老人賜杖几鳩杖勅

記節

停諸節進獻詔

以二月一日為中和節勅

令誕日外命婦賀皇太后勅

許慶成節宴會陳脯醢勅

弋獵

放團兵勅

酬賞鳳泉湯知頻官及百姓勅

禁弋獵勅

喪制

聽衛士終制三年勅

不許臨喪嫁娶及上墓作樂詔

戒厚葬詔

禁喪葬踰禮制

誠厚葬勅

條流葬祭勅

朝賀

冬至取次日朝賀勅

王者父事天母事地所以昭孝敬之道彰神祇之德朕

虔奉明命徧稽大猷實在緣情不惟相襲伏以昊天上帝義在尊嚴恭惟祀典每用冬至既於是日有事圜丘更受朝賀實深兢惕自今以後冬至宜可取以次日受朝仍永為恒式

天寶三年十一月

五月一日御宣政殿勅

仲夏之時陽德方茂陰事始承聖賢因天地交會之時為父子咸覲之禮既行親戚豈隔君臣自我為初申恩卿士起今年五月朔御宣政殿召見文武百官九品以

上外官因朝養在京咸聽就列仍編入式以為恒典

貞元十年四月

淮西用兵罷元會勅

勅淮蔡未賓師人暴露而三朝之會萬國來庭舉觴稱慶有懷愧惕其來年正月朝賀宜權停諸軍優賜並准例

處分

元和十年十二月

貢獻

停貢獻詔

逸遊損德昔賢貽訓玩物喪志前典格言西旅獻獒

公於是作誠東齊餽樂尼父所以離心隋末道喪肆極奢靡內騁倡優之樂外崇耳目之娛冠蓋相望徵求不息公私擾據徭費無窮朕受命君臨志在儉約日旰忘食昧爽求衣纂組珠璣皆云屏退彫琢綺麗久從抑止其侏儒短節小馬庫牛異獸奇禽皆非實用諸有此獻悉宜停斷宣布遐邇咸使聞知

武德元年十月

罷正至進奉勅

勅伐叛興師久勞於外饋軍給費因以為煩獻賀之儀

諒非朕志務從簡約式業永表憂勤其今年冬至及來
年元日諸司諸道進奉宜停

元和十二年

宴集

定州賜宗姓老人宴會勅

皇太子愛敬所覃格於四海仁孝所感周於百姓自春
監國既處定州首創風規在乎茲境所以事親敬養之
道有隱無改之情爰自中山流乎率土地居宣化之本
人稟純孝之深有足可嘉特須優異其定州管內孝行

著聞者宜與宗姓老人同賜宴會

貞觀十九年十一月

賜百官錢令逐勝宴集勅

百靈降福庶尹叶心陰陽調而生植以滋政理孚而黎獻咸若由庚知萬物之樂華泰洽三農之慶信可以率禮輔仁式歌且舞者矣況生成式序氤氲致和卉物榮池籞含麗思順時令以申憲澤咸宜邀歡芳月繼賞前春夙夜在公既同咸一之理休沐式宴俾共昇平之樂中書門下及供奉官嗣王郡王左右丞相少傳賓客

諸司三品以上長官侍郎少卿少匠司業少尹兩縣令
都水使朝集使上佐以上并新除未赴任者及東宮諸
司長官中舍中允少詹事諭德中郎率府蕃官三品以
上至春末以來每至假日宜准去年正月二十九日勅
賜錢造食任逐勝賞

開元十九
年二月

宴朔方將士勅

勅朔方軍節度大使兵部尚書信安郡王禕平戎朔陸
經畧萬里賦車籍馬精卒銳兵自其有虞莫不素練而

醜虜背誕偏師致誅謀若有神取如俯拾雖廟畧之云
遠亦將士之力焉威武載揚頑兇且懾狂寇覆巢以奔
北羣帥掉鞅而來歸因其凱旋聊加宴樂各宜坐食相
與盡歡其軍將以下官賞別有處分信安郡王禕與一
子官

宴幽州老人勅

勅幽州老人師知禮等比者林胡翻覆薦歲不寧戎馬
之鄉良甚艱苦而賊虜自叛天寔誘之主將致誅畧無

遺噍寔除邊患且減征徭卿等忠義因心遠來陳賀深
所嘉尚並宜坐食各有賜物食訖領取

平淮西後宴賞諸軍將士放歸本道詔

勅朕纂奉丕業託於人上仁不破物義不勝奸頌聲茂
聞暴亂連起叛臣希烈竊據淮沂誠哉彼夫無良亦由
朕之不德撫馭之道失之於初師旅一興綿聯莫解服
勞者從役不暇受汙者無路自新旱蝗相乘穀糴翔貴
兵氓餒死十室九空通邑化為丘墟遺骸遍於原野每

念於此心傷涕流且自昔勞師靡有不悔以虞舜之聖
屈於苗人以漢武之強弊於戎虜矧乎德猶不逮力或
未全我其永懷亦已自警乃者下哀痛之詔布寬大之
恩普天載新殊死畢宥然尚勞師旅作扞封陲有累歲
棄離室家有經時不解甲胄忠雖為國咎實在予軍人
若斯寧不知愧賴節將士旅咸奮揚武力慎固疆宇遠
人思服元惡就誅蒸黎方致於安寧役戍永期於休息
懋官以旌美錫宴以勞旋賞不踰時式遵彝典都統檢

校司空同平章事劉玄佐宜與子孫一人五品正員官
節度使檢校右僕射李澄檢校兵部尚書曲環檢校戶
部尚書李皋兼御史大夫樊澤等並與子孫一人七品
正員官都防禦使工部尚書賈耽都團練使檢校左散
騎常侍盧玄卿兼御史大夫張建封等並與子孫一人
八品正員官檢校司空平章事李抱真檢校司空平章
事李納檢校左僕射平章事韓滉檢校工部尚書田
緒咸遣士旅遠赴行營同討不庭厥有成績抱真納滉

與子孫一人八品正員官應與淮西接界州縣本軍鎮
守及諸道赴行營將士等宜共賜三十萬端足以充賞
設度支即約據界首及行營軍額分配定數支送仍委
本道條錄功第名銜聞奏並與甄叙其行營將士仍各
放歸本道明加宣諭令悉朕懷

以水災罷九日宴會勅

屬者春秋令節朝野多歡乃與公族庶僚同茲宴賞今
兩河吳楚連被水灾悼于厥心實未寧息尚軫憂念豈

皇愉樂其九日宴會宜罷

正元八月

養老

賜孝義高年粟帛詔

百行之本要道維先一言終身恕而已矣春生夏長寬
裕之令行焉齊禮道德恥格之義斯在朕爰自幼年夙
稟庭訓豈徒學聞詩禮因令匡定家國是以提三尺之
劍起一旅之師殲鯨鯢於原野救蒸人於塗炭雲雷締
構備嘗夷險仁發於心義形於色大敵必勇匪為身謀

大慙必誅志安天下太上皇留情姑射尚想軒轅駐蹕
大安使朕正居紫極顧惟虛薄辭不獲免祇奉制誥負
宸當朝乃睠宮宇載懷永谷未明求衣乙夜忘寢思齊
七政言念九功何以答上玄之心稱嚴君之志庶欲勤
恤典刑舉直措枉允釐臣工任賢用能拯濟困窮抑損
澆偽開直言之路廣不諱之門聞所未聞日慎一日望
人皆見德變於至道若一物失所一人有惡則朕躬之
責訓道不篤朕聞書曰至誠動神況於兆庶乎止聞遠

近黔黎恥為盜賊州縣囹圄多並空虛豈由德教至此
自是人知厭亂因其遷善可以化之朕徃因征伐行天
下多矣每見村落丘墟未嘗不撫膺歎息自登九五不
許橫役一人惟冀遐邇休息得相存養長幼有序敬讓
興行其孝義之家賜粟五石高年八十以上賜粟二石
九十以上三石百歲加絹二疋婦人正月以來生男粟
一石鰥寡惻獨不能自存逃戶初還郊無糧貯州縣長
官量加賑卹諸州官吏或正直廉平刑清訟息或貪婪

貨賄害政損人宜令都督刺史以名封進白屋之內閭閻之人但有文武材能灼然可取或言行忠謹堪理時務或在昏亂而肆情遇太平而克已亦錄名狀與官人同申泣辜慎罰前王所重枉繫一日直等三秋州縣法司特宜存恤布告天下知朕意焉

貞觀三年四月

老人賜几杖鳩杖勅

古之為政先於尚老居則致養禮傳三代行則就見制問百年蓋皇王之勸人教黎庶之為子朕寅奉休歷祇

膺聖訓因秋歸而歲成屬星見而郊祀念其將智尤重
乞言俾申恩於几杖其布惠於鄉國九十以上宜賜几
杖八十以上宜賜鳩杖所司准式天下諸州侍老宜令州
縣逐穩便設酒食一准京城賜几杖其婦人則送几杖
於其家

紀節

停諸節進獻詔

朕撫育黎庶思求政道欲儉以訓俗禮以移風菲食卑

宮幾庶前軌比至五月五日及寒食等諸節日并有歡慶事諸王妃主及諸親等營造衣物雕鏤雞子競作奇巧以將進獻巧麗過度靡費極多皆由不識朕心遂至於此又貞觀年中已有約束自今以去並宜傳斷所司明加禁察隨事糾正

顯慶二年四月

二月一日為中和節勅

四序嘉辰歷代增置漢崇上巳晉紀重陽咸說禳除雖因舊俗與衆共樂誠洽當時朕以春方發生候及仲月

勾萌畢達天地和同俾其昭蘓宜助暢茂自今宜以二月一日為中和節以代正月晦日備三令節之數内外官司休假一日

貞元五年正月

令誕日外命婦賀皇太后勅

昔者聖王之以孝理天下也廣愛敬之心推於四海盡奉養之志示於兆人然後自誠之化有情斯感朕以眇身祇荷鴻業皇太后就安長樂朝夕承顏慈訓所加慶感無極伏以今月六日是載誕之辰奉迎皇太后宮中

上壽朕獲申歡慰亦欲公卿大夫同之宜以今月六日
平明於光順門集百寮及命婦進名賀皇太后御光順
門內殿與百寮相見永為常式

貞元十五年七月

許慶成節宴會陳脯醢勅

慶成節朕之生辰天下錫宴庶同歡泰不欲屠宰用表
好生非是信尚空門將希無妄之福恐中外臣庶不諭
朕懷廣置齋筵大集僧衆非獨凋耗物力兼恐致惑生
靈自今宴會蔬食任陳脯醢永為常例咸使聞知

開成二年

八月

弋獵

放圍兵勅

昔周有岐陽之蒐漢有扶風之命講師習武夸勝耀威
故王者狩必以時招虞人以禮時則遠矣朕自祇膺圖
錄於茲四年每巡狩郊畿不出百里且愛力而節用非
盤遊而好樂今者四方無事百穀有成因孟冬之月臨
右輔之地戒茲五校爰備三駟謂獲多庶存除害一昨

長圍已合大綏未舉而夜聞朔風降微雪狐裘且御未免
初寒鶉衣不充寧堪凍露朕更截狡獸要輕禽以此
遊娛孰云矜恤況為之父母育彼黎元中宵耿然明發
增惕其圍兵並宜放散各賜布一端綿一屯

開元三年十月

酬賞鳳泉湯知頓官及百姓勅

勅清人賦田以備蒐狩之儀王者順時式崇豫遊之禮
頃者築場初畢清道來巡經上林之苑園指扶風之藪
澤雖獵將提鼓虞人植旗仍憫祁寒之節不行肅殺之

令豈唯虞舜之典咸秩山川所冀周文之風及於鳥獸
由是罷還士卒非重盤遊眷彼吏民致有煩擾所謂行者
幸也後來其蘇宜申恩惠用符古昔其所經州縣供頓
官及百姓并造鳳泉湯屋宇使及夫匠并置營幕橋道
使宜令所司勘會奏聞其緣御路及頓場麥苗有損者
亦令勘責量事酬補

開元三年十月二十六日

禁弋獵勅

春夏之交稼穡方茂永念東作其勤如傷況時屬陽和

令禁麝卵所以保茲懷生下遂物性如聞京畿之內及
關輔近地或有豪家時務弋獵放縱鷹犬頗傷田苗宜
令長吏常切禁察有敢違令者捕繫以聞

太和四年三月

喪制

聽衛士終制三年勅

通喪下達聖哲貽訓緯俗經邦咸率至道至於嬰蓼莪
之巨痛懷顧復之深慈得自天經含生罔極者也爰自
周哀七雄交爭逮乎漢末三方競峙金革亟動鉦鼓日

聞先王典章掃地將盡遂令三邊武猛墨經而扈戎麾
七萃驍雄素冠而事巡警亦有內無繼體傍闕同氣几
筵安寄奠酌不親乃睠於斯再深驚歎膺茲景業君臨
九野中區富教化俗承規宜有解張茲勵風俗衛士掌
閑幕士等遭喪合期年上者宜聽終制三年

永徽元年五月

不許臨喪嫁娶及上墓歡樂詔

如聞父母初亡臨喪嫁娶積習日久遂以為恒亦有送
葬之時共為燕飲逋相酌勸酣醉始歸或寒食上墓復

為歡樂坐對松檟曾無戚容既點風猷並宜禁斷仍令

州縣捉搦勿使更然

龍朔二年三月

戒厚塋詔

朕聞死者終也欲物之反於真也塋者藏也欲人之不得見也上古垂風未聞於封樹後聖貽範始備於棺槨譏僭侈者非愛其厚費美儉薄者實貴於無危是以唐堯聖帝也谷林有通樹之說秦穆明君也橐泉無丘壠之處仲尼孝子也防墓不墳延陵慈父也嬴博可隱洎

乎闔閭違禮珠玉為鳬雁始皇無度水銀作江海因多
藏以速禍由有利以招辱朕居四海之尊承百王之弊
未明求衣中宵載惕雖送往之典詳諸議制失禮之禁
著在刑書而勲戚之家多流遁於習俗閭閻之內或侈
靡而傷風以厚葬為奉終高墳為行孝遂使衣衾棺槨
極雕刻之華芻靈明器窮金玉之費富者越法度以相
高貧者破資產以不逮徒傷教義無益泉壤為害既深
宜有懲革其公卿以下爰及黎庶送終之具有乖令式者

明加檢察隨狀科罪在京五品以上及勲戚之家錄狀

聞奏

貞觀十七年三月

禁喪踰禮制

喪葬禮義蓋惟恒式如致乖越深蠹公私乃有富族豪家競相踰濫窮奢極侈不遵典法至於送終之具著在條令明器之徒皆有色數遂敢妄施隊伍假設幡稍兼復創造園宅彫剪花樹或桐闌木馬功用尤多或告舉凶綵飾殊貴諸如此類不可勝言貴賤既無等差資產

為其損耗既失芻靈之義殊乖朴素之儀此等犯違先
已禁斷州牧縣宰不能存心御史金吾曾無糾察積習
成俗頗紊彛章即宜各令所司重更申明處分自今以
後勿使更然

證聖元年三月

誠厚葬勅

自古帝王皆以厚葬為戒以其無益於亡者有損於生
業故也近代以來共行奢靡迭相倣倣浸成風俗罄竭
家產多至凋弊然則魂魄歸天明精識之已遠卜宅於

地蓋思慕之所存古者不封未為非達且墓為真宅自有便房今乃別造田園名為下帳又明器等物皆競驕侈失禮違令殊非所宜戮屍暴骸寔由於此承前雖有約束所司曾不申明喪葬之家無所依准宜令所司據品命高下明為節制明器等物仍定色數長短大小園宅衣帳並宜禁絕墳墓營域務遵簡儉凡諸送終之具並不得以金銀為飾如有違犯者先決杖一百州縣長官不能舉察並貶授遠官

開元二年八月

條疏葬祭勅

葬祭之儀古有彝範頃來或踰法度侈費尤多自今以後宜儉約悉依令不得於街衢致祭及假造花果禽獸

并金銀平脫寶鈿等物並宜禁斷

大歷七年三月

唐大詔令集卷八十

欽定四庫全書

唐大詔令集卷八十一

宋 宋敏求 編

政事

禮樂

太常樂人蠲除一同民例詔

頒行唐禮及郊廟新樂詔

用慶善曲破陣樂詔

詔習禮樂詔

禁斷女樂勅

內出雲韶舞勅

雅樂名大唐樂制

經史

命蕭瑀等修六代史詔

修晉史詔

簡擇史官詔

令諸儒質定古文孝經尚書詔

行何鄭所注書勅

改尚書洪範無頗為陂勅

錄開元以來名臣事迹付史館勅

條貫起居注勅

禮樂

太常樂人蠲除一同民例詔

太常樂人今因罪謫入營署習藝伶官前代以來轉相

承襲或有衣冠徹者公卿子孫一沾此色後世不改婚
姻絕於士類名籍異於編氓大恥深疵良可哀愍朕君
臨區宇思從寬惠永言淪滯義存刷蕩其大樂鼓吹諸
舊人年月已久世代遷易宜得蠲除一同民例但音律
之伎積學所成傳授之人不可頓闕仍依舊本司上下
若已仕官見入班流勿更追呼各從品秩自武德元年

以來配充樂戶者不在此例

武德二年八月

頒行唐禮及郊廟新樂詔

先王之辨方正位體國經野象天地以制法通神明以
施化樂由內作禮自外成可以安上治民可以移風易
俗揖讓而天下治者其惟禮樂乎固以同和無體非飾
玉帛之容豈崇鐘鼓之奏日來月往樸散淳漓慝迭
興流而忘本魯昭所習唯在折旋魏文所重止於鄭衛
秦氏縱暴載籍咸亡漢朝修緝典章不備時更戰國多
所未遑雅道淪喪歷茲永久朕恭承明命嗣膺玉歷懼
深馭朽情切納隍憑宗廟之靈資股肱之力上下交泰

遐邇又安率土貼危既拯之於塗炭羣生遂性復納之於軌物興言政本載惕於懷蓋知禮樂之情者能作識禮樂之文者能述作者之謂聖述者之謂明朕雖德謝前王而情深好古傷大道之既隱懼斯文之將墜故廣命賢才旁求遺逸探六經之奧旨採三代之英華古典之廢於今者咸擇善而修復鄭聲之亂於雅者並隨違而矯正莫不本乎人心稽之物理正情性而節事宜窮高深而歸簡易用之邦國彞倫以之攸叙施之律呂金

石於是克諧今修撰既畢可頒行天下俾富教之方洵

符先聖人倫之化貽厥後昆

貞觀十一年四月

用慶善曲破陣樂詔

國家平定天下革命創制紀功旌德久被樂章今郊祀
四懸猶用干戚之舞先朝作樂韞而未申其郊廟享宴
等宮懸丈舞宜用功成慶善之樂皆著履執拂依舊服
袴禮童子冠其武舞宜用神功破陣之樂皆被甲持戟其
執纛之人亦著金甲仍量加簫笛歌鼓等於懸南列坐

與宮懸合奏

麟德二年十月

詔習禮樂詔

禮樂之用其來尚矣朕誕膺明命克光丕歷思隆頌聲以康至道而曲臺闡訓猶乖揖讓之容大樂登歌徒紀鏗鏘之韻良以教虧綿蕞學闕瞽宗興言盛業寤歎曷已然則幽誠所著縱九臯而必聞忠信且存在十室而無棄但慮習俎之彥隱跡於閭閻辨鐸之英韜聲於林藪夫良玉無趾求之斯來真龍難覩好之而至其四方

士庶及丘園栖隱有能明習禮經詳究音律於行無違
在藝可錄者並宜州縣搜揚博訪具以名聞

禁斷女樂勅

朕聞樂者起於心心者動於物物不正不可為樂樂不
正則不能理人況天生黎蒸區別男女外則不能導之
以禮中則不能由之以樂苟或不臧孰云致理自有隋
頽靡庶政彫缺徵聲遍於鄭衛銜色靡於燕趙廣場角
抵長袖風飄聚而觀之浸而為俗所以戎王奪志夫子

遂行也朕方大變澆訛用清淄蠹睠茲女樂事切驕淫
傷風害政莫斯為甚既違令式尤宜禁斷自今以後不
得更然仍令御史金吾嚴加捉搦如有犯者先罪長官
務令杜絕以稱朕意

開元二年
八月七日

內出雲韶舞勅

朕聞舞者所以節八音而行八風豈徒誇詡時代眩耀
耳目而已也自立雲韶內府百有餘年都不出於九重
今欲陳於百姓冀與公卿同樂豈獨娛於一身且珠翠

綺羅孰非珍玩常念百金之費每惜十家之產是以所
服之服俱非羅綺所冠之冠亦非珠翠至若弋綈之制
大帛之衣德雖謝於古人儉不慚於曩哲庶羣公等觀
此當體朕之不奢

開元十二年正月

雅樂名大唐樂制

王者作樂古之大猷蓋以殷薦上帝嚴配祖考況順天
地之體開山川之風發揮雅音道達和氣揖讓而理不
其盛歟自戰國以來此道隳壞但紀鏗鏘之節寧探述

作之深歷代因循莫之改革朕嘗以聽政之暇緬尋前
典雖舊制之空存而正聲之多缺將何以列彼祠祀感
於靈神斯事體大諒資合度是用躬親有以裁校定六
律而為本避五行之相剋哀慢淫過去其弊也清濁剛
柔適其中也亦既協應頗為成文或得之於自然乃不
知其本然豈上玄幽贊俾正缺遺者哉方於六代之作
亦各一時之義也乃命奉常陳於祀事用昭誠敬且敦
風俗而王公卿士爰及有司頻詣闕上言請以唐樂名

斯至公事朕安得而辭焉然則大舜大禹皆以大
字表其樂章今之所請宜曰大唐樂

開元二十九年六月

經史

命蕭瑀等修六代史詔

經典序言史官紀事考論得失究盡變通所以裁成義
類懲惡勸善多識前古貽鑒將來伏羲以降周秦斯及
兩漢傳緒三國並命迄于晉宋載籍備焉自有魏南徙
上乘機運周隋禪代歷世相仍梁氏稱邦跨據淮海齊

遷龜鼎陳建宗枋莫不自命正朔綿歷歲祀各殊徽號
剛定禮儀至於發跡開基受終告代嘉謀善政名臣奇
士立言著績無乏於時然而簡牘未修紀傳咸缺炎涼
已積謠俗還訛餘烈遺風泯焉將墜朕握圖馭宇長世
字民方立典謨永垂憲則顧彼湮落用深歎悼有懷撰
錄實資良直中書令蕭瑀給事中王敬業著作郎殷聞
禮可修魏史侍中陳叔達秘書丞令狐德棻太史令唐
儉可修周史兼中書令封德彝中書舍人顏師古可修

隋史大理卿崔嘉中書舍人孔紹安太子洗馬蕭德言
可修梁史太子詹事裴矩兼吏部郎中祖孝孫前秘書
監魏徵可修齊史秘書丞竇璡給事中歐陽詢秦王文
學姚思廉可修陳史務加覈詳博採舊聞義在不刊書
法無隱

武德五年
十二月

修晉書詔

朕拯溺師旅省方禮畢四海無事百揆多閒遂因暇日
詳觀典府考龜文於義載辨鳥冊於軒年不出岩廊神

交千祀之外穆然流續臨睨九皇之表是知右史序言
斯不爽昧左官詮事歷茲綿遠發揮文字之本通達書
契之源大矣哉蓋史籍之為用也自沮誦攝官之後伯
陽載筆之前代列史臣皆有刪著仲尼修而採摭杞倚
相誦而闡丘墳降自西京班馬騰其茂寔逮於東漢范
謝振其芳聲最爾當塗陳壽覈其國志眇哉劉宋沈約
裁其帝籍至梁陳高氏朕命勒成惟周及隋亦同甄錄
莫不彰善癉惡激一代之清芬褒吉懲凶備百王之令

典唯晉氏膺運制有中原上帝啟玄石之圖下武代黃
星之德及中朝鼎革江左嗣興並宅橐區式重徽號足
以飛英麗筆將美冊書但十有八家雖存記注而才非
良史事虧寔錄緒煩而寡要思勞而少功叔寧課虛滋
味同於畫餅子雲學海涓滴湮於涸流處叔不然於中
興法盛莫通於創業洎乎千陸曹鄧略記帝王鸞盛廣
松纔編載記其文既野其事罕傳遂使典午清高韜遺
芳於簡冊金行曩誌缺繼美於驪駟遐想寂寥深為歎

息宜令修國史所更撰晉書銓次舊聞裁成義類俾夫
湮洛之誥咸使發明其所須可依修五代史故事若少
學士亦量事追取

貞觀二十
年閏二月

簡擇史官詔

修撰國史義在典寔自非操履貞白業量該通謹正有
聞方堪此任所以承前縱居史官必就中簡擇灼然為
衆所推者方令著述如聞近日以來但居此職即知修
撰非唯編輯踈舛亦恐漏泄史事自今以後宜遣史司

於史官內簡擇堪任修史人錄名進內自餘雖居史職
不得輒令聞見所修史籍及未行用國史等事

總章三年十月

令諸儒質定古文孝經尚書詔

孝經尚書有古文本孔鄭注其中指趣頗多踳駁精義
妙理若無所歸作業用心復何所適宜令諸儒并訪後
進達解者質定奏聞

開元七年三月

行何鄭所注書勅

朕以全經道喪大義久乖淳感之性浸微流通之源未

息是用旁求廢簡遠追缺文欲使發揮異說同歸要道
永惟一致之用以開百行之端間者諸儒所傳頗乖通
議敦孔學者冀鄭門之息滅尚今文者指古傳為誣偽
豈朝廷並列書府以廣儒術之心乎况孔鄭大宗固多
殊趣諸生會議曾無所申而推求小疵其細已甚聚訟
之訓人無則焉其何鄭二家可令仍舊行用王孔所注
傳習者希宣布繼絕之典頗加獎飾子夏傳逸篇既廣
前令帖易者停

開元七
年五月

改尚書洪範無頗為陂勅

孫述

勅典謨既作雖曰不刊文字或訛豈必相襲朕聽政之暇乙夜觀書匪徒閱於微言實欲暢於精理每讀尚書洪範至無頗遵王之義三復茲句常有所疑據其下文並皆協韻唯頗一字寔則不倫又周易泰卦中無平不陂釋文云陂有頗音陂之與頗訓詁無別為陂則文亦會意為頗則聲不成文應由煨燼之餘編簡墮缺傳授之際差別相沿原始要終須有刊革朕雖先覺兼訪諸

儒僉以為然終非獨斷其尚書洪範無偏無頗字宜改為陂庶使先儒之義去彼膏盲後學之徒正其魚魯仍令宣示國學

錄開元以來名臣事迹付史館勅

勅朕君臨萬邦多歷年所於今行事動必見書循以舊章傳諸寔錄豈朕之獨理所賴良臣或謀猷以濟其事或規諷以成其道開元以來勲庸德業咸宜備叙其身已沒者宜令子孫具錄事迹送史館

開元二十五年五月

條貫起居注勅

記事記言史官是職昭垂法誠著在舊章舉而必書朕
所深望自今以後每坐日宰臣及諸司對後如是可備
勸誠合在紀述者委承旨宰相宣示左右起居綴錄仍
准舊例每季送史館

元和十二年九月

唐大詔令集卷八十一

欽定四庫全書

唐大詔令集卷八十二

宋 宋敏求 編

政事

刑法

頒新律令詔

糾劾違律行事詔

頒行新律詔

法司及別勅推事並依律文詔

恤刑詔

頒行新令制

申理冤屈制

頒行律令格式制

減大理丞廢秋官獄勅

申冤制

訴事人先經州縣勅

減抵罪人決杖法詔

令宰臣與法官詳死刑勅

寬徒刑配諸軍効力勅

頒行新定律令格式勅

罪至死者勿決先杖勅

刪定制勅

禁罪人鞭背勅

頒歷

頒行麟德歷詔

更改閏月制

刑法

頒新律令詔

古不云乎萬邦之君有典有則辨方正位體國經野故
九疇之叙興於夏世兩觀之法大備隆周所以禁暴懲
奸宏風闡化安民立政莫此為先自戰國紛擾恃詐任
力苛制煩刑因茲競起秦并天下隳滅禮教恣行酷烈

害虐蒸民宇內騷然遂以顛覆漢氏撥亂思易前軌雖
務從約法蠲削嚴科尚行菹醢之誅猶設錙銖之禁字
民之道寔有未宏刑措之風以茲莫致爰及魏晉流弊
相沿寬猛乖方網維失序下凌上替政散民凋皆由法
令混訛條章錯謬自斯以後宇縣瓜分戎馬交馳未遑
典制有隋之世雖云釐革然而損益不定疎舛尚多品
式章程罕能甄備加以微文曲致覽者惑其深淺異例
同科用者殊其輕重遂使奸吏巧詆任情與奪愚民妄

觸動陷羅網屢聞釐革卒以無成朕膺期受錄寧濟區
宇永言至治興寐為勞補千年之墜典拯百王之餘弊
思所以正本澄源式清流末永垂憲則貽範後昆爰命
羣才修定科律但今古異務文質不同喪亂之後事殊
曩代因機適變救弊斯在是以斟酌繁省取合時宜矯
正差遺務從體要迄茲歷稔撰次始畢宜下四方即令
頒行庶使分曹簡肅無取懸石之多奏讞平允靡競錐
刀之末勝殘去殺比為非遠其修撰之人宜加官賞

武德

七年
四月

糾劾違律行事詔

朕恭膺寶命撫臨率土永鑒前王憲章典故雖文質遞
變沿革不同而發號施令殊塗一揆皆所以成當世之
典謨開生民之耳目納之軌度令行禁止自律令班下
積有歲時內外羣官多不尋究所行之事動乖文旨此
乃臣有所隱民不見德與不令而誅何以異也斯豈守
道履正徇公奉法者乎自今以後官人行事與律乖違

者仰所司糾劾具以名聞

貞觀元年八月

頒行新律詔

象服畫冠化隆上乘道德齊禮刑清中代暨乎大道既
隱淳風已衰析楊所以實煩手足為之無措自斯以降
禁網愈密太宗文皇帝撥亂反正恤獄慎刑杜澆弊之
大源削煩苛之峻法道臻刑措二十三年玉几遺訓皇
令刊改朕仰遵先旨旁求故實乃制太尉楊州都督無
忌開府儀同三司勣尚書左僕射行成光祿大夫侍中

高季輔右丞段寶玄太常少卿令狐德棻吏部侍郎高敬言刑部郎中賈名行等爰逮朝賢詳定法律酌前王之令典考列辟之舊章適其輕重之宜採其寬猛之要使夫畫一之制簡而易從約法之章疎而不漏再移期月方始勒成宜頒下普天垂之來葉設而不犯均被上皇凡在羣臣逮於列岳其務在審慎稱朕意焉

永徽二年九月

法司及別勅推事並依律文詔

朕聞大小之情義重前誥哀矜勿喜道光遐冊朕恭膺

寶業嗣臨億兆留心聽斷劬勞日積一物乖方納隍軫
慮今既科格咸備憲制久行訊鞠之法律條具載深文
之吏猶乖遵奉肆行慘虐曾靡仁心在含氣之倫稟柔
脆之質乃有懸枷著樹經日不脫身被五木連宵忍凍
動轉有碍食飲乖節殘酷之事非復一途楚痛切心何
求不得念及於此深以矜懷又投匿名書國有常禁凡
厥寮庶咸應具悉近遂有人向朝堂之側投書於地隱
其姓名誣人之罪朕察其所陳皆極虛妄此風若扇為

蠹方深自今以後内外法司及別勅推事並依律文勿更別為酷法其匿名書並宜准律處分庶使泣辜之事遠覃於四海卹刑之旨長垂於萬年

永徽六年十一月

恤刑詔

哀矜折獄義光呂訓明慎用刑事昭姬象朕以寡昧嗣登宸極思聞大猷式隆景運蹈冰彌懼屬想於寰中馭朽彌競馳襟於裕下虛已待物每從寬政如聞率土州縣留獄尚繁困於囚繫致於病死一歲之中數盈二百

蓋由上乏亭育之化下乖堯舜之心深責在躬興言多愧抑又聞之共成我理天下者其惟良二千石今之所任或虧政道未詳欽恤之旨苟徇苛刻之情幽繫困滯証逮遐廣寒暑相襲風露交侵淹乎年歲成其疾苦加以杖笞失度桎梏違方巧詆深文生全安在獄市之寄何其爽與自茲以後宜革前弊罪無大小不得稽留其囚疾患及輕罪並笞杖等雖法有恒規恐典吏妄生威福官人不存檢校或顏面囑請觸類以之若仍舊不悛

當加重罪布告天下知朕意焉

龍朔二年八月

頒行新令制

門下蓋大帝臨下覆幬之德彰焉聖人在上財成之跡著焉然則統天理運微政令不能通其道經國訓人非渙汗無以宣其化故羲又演繇后以施命誥四方虞典記言帝乃敷文被九域豈惟道人振鐸理存乎闡教象闕懸書義在於垂法雖時分步驟必循先甲之現代變驪駟無革違名之軌既而淳源已往澆風漸扇奸宄於

欽定四庫全書

是萌生譎詐以之颺起相彼羣俗頗乖於信義顧茲庶
尹罕嗣於忠勤尺一交馳徒有書亭之弊五條間出猶
招挂壁之譏非所謂光闡帝圖作為人極者也由此綠
綈爰降尤慎於繁冗黃素所施彌崇於喻曉皇家創業
抑揚前古粵在貞觀大啟憲章決聲教於幽潛燭文明於
區宇鴻池衍誥統理詳密螭鈕騰文規模宏遠固以貽
厥將來懸諸日月朕祗肅鴻業恭臨寶位握千載之禎
符承百王之末緒凝神閒館託軒夢以憂人採誦康衢

用堯心而拯物然以萬機事廣恐聽覽之或遺四海務
殷慮緝采之多厭南宮故事綜覆已殫內史舊章搜羅
殆盡自御宸扆每懷氷谷身雖處於岩廊情寔係於億
兆比者在外州府敷陳表疏示下諸司亦多奏請朕以
為帝命多緒範圍之旨宏王言如絲彌綸之道洽前後
處分因事立文歲序既淹條流遂積覽之者滋惑行之
者愈怠但政貴有恒詞務體要道廣則難備事簡則易
從故自永徽以來詔勅俱令沙汰詳稽得失甄別異同

原始要終捐華摭實其在俗非便事縱省而悉除於
時適宜文雖繁而必錄援義刪定以類區分上稟先規
下齊庶政導生靈之耳目闢風化之聲牖俾夫施之萬
祀周知訓夏之方布之八埏共識司南之路仍令所司
編次具為卷帙施行此外並停自今以後諸有表奏事非
要切並准勅令各申所司可頒示普天使知朕意

儀鳳元年

十二月
五日

申理冤屈制

門下大帝降覽無幽不燭下人上訴在屈必申將使處
岩廊者戶牖絕千里之遙御億兆者閤庭無九重之隔
故堯推心以撫俗業濟天下湯克己以察寃惠孚海內
朕祇膺歷嗣寅奉璇圖常居安以戒危每在得而思失
慮一夫之弗獲憂萬方之罪已為承平既久區寓至廣
州邑相望衆庶殷阜事繁則詐起法弊則奸生念茲寃
滯載懷悱惻是以頻發詔書庶幾息訟比命申理未副
朕懷百姓雖事披論官司不能正斷及於三司陳訴不

為究尋向省告言又却付州縣至財物相侵婚田交爭
或為判官受囑有理者不申或以按主取錢合得者被
奪或積嫌累載橫誣非罪或肆忿一朝枉加殺害或頻
經行陣竟無優賞或不當矢石便獲勲庸改換文簿更
相替奪或於所部憑情織作少付絲麻多收絹布或營
造器物耕事田疇即役履功雇無半直又境內市買無
所畏憚虛立賤價抑取貴物寔食貪利以侵人乃據詳
估以放罪或進退丁戶等色多有請託或解補省佐之

流專納賄賂或徵科賦差點兵防無錢則貧弱先充行
貨則富强獲免亦有鄉邑豪族容其造請或酒食交往
或妻子去還假託威恩公行侵暴凡如此事固非一緒
經歷臺省往來州縣動淹年歲曾無與奪欲使元元何
所控告見在京師訟人宜令朝散大夫守御史中丞崔
謐朝散大夫守給事中劉景先朝請即守中書舍人裴
敬彝等於南衙門下外省共理冤屈所有訴訟隨狀為
勘其當理者速即奏聞無理者示語發遣其有虛相構

架浪擾官司若經處分諠訴不絕者宜即科決使知懲
勸仍限今年十二月內使了其在外州縣所有訴說冤
滯文案見未斷絕者並令當處速為盡理勘斷務使甘
伏勿使淹滯若處斷不平所司糾察得寔者所由官人
隨即糾付可布告遐邇使知朕意

儀鳳二年十一月十三日

頒律令格式制

門下朕聞唐虞膺錄畫象而人知禁夏商御圖設刑而
罪不息周秦以降沿革罕同漢魏而還條流浸廣雖或

輕或重一弛一張義在於訓人事期於肅物然則刑辟勿
用見稱於昔典法令滋章貽譏於前哲朕情在愛育志切
哀矜疎網恢恢寔素懷之所尚苛政察察良夙心之所
鄙方冀化致無為業先刑措覓所司進律令格式一一
自觀至於經邦成務之規訓俗懲違之範萬目咸舉
一事無遺但能奉以周旋守而勿失自可懸諸日月播
之黎庶何事不理何化不成先聖憂勤萬務遺念庶績
或慮須有弛張所以泛令刪定今既網維脩舉法制宏通理

在不刊義歸無改豈可更有異同別加撰削必年月久
遠於時用不便當廣延羣議與公卿等謀之今未有疑
無容措筆其先定律令格式之本宜早宣布凡厥在職
務須遵奉輒造異端妄踰軌躅者咸禁除之庶用刑符
於畫一守法在於無二內外寮案知朕意焉

文明元年四月二十

六日

減大理丞廢秋官獄勅

竊臺崇德簡刑列辟之彛範并官省事有國之良圖聖

人執契以乘時道苞乾大善政改絃而馭俗義叶鼎新
朕處荷先基恭臨下土運一心之淺慮憂四海之羣生
馭朽載兢踐冰惟惕幸賴九玄垂祐七廟宣靈天地以
清風雨咸若菽粟登稔疆徼無虞茂祉日繁休禎歲集
答昊穹之睠命順億兆之識知蒼壁靈壇展嚴禋於上
帝黃金秘牒追顯號於前王大典聿申鴻符允暢斯寔
祖宗之遐慶丞夏之多福豈朕虛薄能臻此乎但萬歲
初元肇開昌歷九章恒憲甫釋嚴科遠近無縲紲之寃

老幼有歌謠之樂人皆遷善政在惟新丹筆刑官已絕
理格之聽黃沙獄戶將為鞠草之場而法禁之曹案寮
斯衆司刑一局便有八丞既罕囚徒靜無推案豈煩多
士虛習夏書宜減二員俾從他職文昌國府建禮天闡
庶政是歸具寮攸仰諒青纁之美地非頽服之攸居雖
復時有申讞頗須聽斷兩造之文必具五詞之理易窮
詎假狴牢方甄枉直仙臺置獄甚為非宜今欲總撤踈
羅寧可別施圉圉其秋官獄即宜除毀朕既深居秘宇

不能遍覽綿區唯仗時賢共康天下州牧縣宰寄重親
人僚守勾曹任惟綱紀百姓或有所犯必須盡理推尋
審知罪狀分明方可禁身科斷不得才聞小過遽繫圜
扉高下其心同叔魚之鬻獄輕重其手與定國之平刑
黠吏崇奸恣其乾沒要囚多滯積以炎涼有一於茲當
加貶譴幸悉心而慎罰同底績以勝殘佇宏勿辟之規
用闡無為之化將使三千之罪永絕於當年豈惟數百
之刑僅寬於昔代布告天下識朕意焉

登封元年十
月十一日

申寃制

門下九重深邃非訪問之可聞萬邦遐曠因表䟽而方
達朕尊居黃屋心念蒼生微物不安每切納隍之慮一
人失業更縈宵旰之懷思欲下情上通無令擁隔所以
盟聰者也其官人百姓等有寃滯未申或獄訟失職或
賢才不舉或進獻謀猷如此之流任其投匭凡百士庶
宜識朕懷

神龍元年二月二十七日

訴事人先經州縣勅

六卿分設諸郡咸理在於人下合免寃滯如聞越局侵
務背公向私其傷則多為政必紊宜令天下州縣百司
察案俱守乃曹各勤所職或有身名尚屈刑罰不平賦
役未均徵差無次爰及侵奪亦兼違負凡人所訴大畧
如斯若縣不為申州必須舉州不能理省必為裁上下
相持寃訟可息自今以後訴事人等先經縣及府州并
尚書省被理由延滯不為斷決委御史採訪奏聞長官

以下節級量貶

開元十年
閏三月

卷八十二
減抵罪人決杖法詔

勅大德曰生至重曰命緬觀前典惟刑是恤比來犯盜
先決一百雖非死刑大半殞斃言念於此良用惻然自
今以後抵罪人合決杖者並宜寬決杖六十一房家
口移隸磧西其嶺南人移隸安南江淮人移隸廣府劍
南人移隸姚鵠州其磧西姚鵠安南人各依常式

開元

十二年
四月

令宰臣與法官詳死刑勅

朕猥集休運多謝括王然而哀矜之情大小必慎自臨
寰宇子育黎蒸未嘗行極刑大獄上玄降鑒應以祥和
思叶平邦之典致之仁壽之域自今有犯死刑十惡宜
令中書門下與法官詳所犯輕重具狀奏聞

寬徒刑配諸軍効力勅

孫逖

勅刑之所設將以閑邪法不在嚴貴於知禁朕自臨萬
國向踰三紀思宏至道之化寔務好生之德比者應犯
極法皆令免死配流所以市無刑人獄無冤繫哀矜勿

喜冀洽於生靈小大以情寧忘於鑒寐至於徒罪雖非
重刑力役之外不免拘繫載惟寒暑誠可矜量自今以
後其犯罪應合徒者並配諸軍効力庶感激之士因以
成功寬大之恩叶於在宥且本置杖罪是代肉刑將以
矜人非惟重法今官吏決罰或有生情因茲致死深可
哀憫其犯杖罪情非巨蠹者亦令効力宜令所司作載

限立條例處分

天寶四年七月

頒行新定律令格式勅

孫逖

勅簡而易從疎而不漏二者之義良有旨哉朕思正國
綱舉為大化至於律令格式政之隄防豈非訟襲亦致
增損條流既廣繁冗遂多或輕重不倫或交互相背侮
法之吏因以情坐得罪之人何妨悞入觸類而長頗乖
折中永言於此是用興懷先令中書門下及明法人等
商量刊定兼亦採諸羣議徧示具寮泊乎畢功已淹歲序
近者親覽又歷旬時如此再三事亦詳慎不刊之典故
亦庶乎適時之方斯其宜矣可頒告天下

罪至死者勿決先杖勅

比者所司斷罪拘守科條或至死刑猶決先杖處之極

法重此傷殘非惻隱也自今罪至死者勿決先杖

貞元八年

十一月

刪定制勅

元和長慶之中皆因用兵且欲濟事所下制條或是權
宜今四方少寧庶政須理每有司檢舉行下則諸道援
引申論所執不同遂成舛駁若不刊定則無准憑宜令

尚書省諸行郎官各取本司元和以來勅叅詳定訖送
都省令左右丞重與尚書侍郎覆視更加裁度送中書
門下議定奏聞

太和元年六月

禁罪人鞭背勅

朕比屬暇日周覽國史伏覩太宗因閱明堂見五臟之
系或附於背乃下制決罪人不得鞭背且人之有生繫
於臟腑針灸失所尚致天傷鞭朴苟施能無枉橫况五
刑之內笞最為輕豈可以至輕之刑傷至重之命朕恭

承丕業思奉貽謀言念於茲載懷惻隱其天下州府應
犯輕重罪人除奸情巨蠹法所難原其他過誤罪愆及
尋常公事違犯並准貞觀四年十一月十七日制處分
不得鞭背今年以後每至夏至後立秋以前犯罪人就
將常條之中亦宜量與矜減速為疎理不得令久禁繫
委御史臺切加糾察永為常式

太和四年四月

頒歷

頒行麟德歷詔

夫氣象初分乾坤之位斯定剛柔通運寒暑之節攸施
而晦朔相循炎涼載革歸乎推步方紀歲時顓頊應期
重黎司天地之職放勳承統羲和掌日月之官履端之
道無睽舉正之典斯在洎乎末代漸致踈闊鄧平之術
既已多乖朱浮之言罕能遵用九章五紀莫究精微日
次月躔寧循晷度朕御天撫歷君臨萬方眷言茲道將
恐淪缺欽若垂化曷所憑焉爰命所司研窮詳正仰稽
七曜傍綜五家去其繁衍裁以要密古所未通今則備

載陰陽之數可測盈縮之理無愆改元履初占考此歷
歲唯甲子得於天正合朔之後應以嘉祥五緯步連珠
二曜若合璧雖上玄至遐寔深祗愧而推測所詳固已
精悉氣序恒順分餘弗舛以受農祥升平可致昔洛下
閎造漢歷云後八百歲當有聖人定之自火德洎我年
將八百事合當仁朕亦何讓宜即宣布永為昭範可名

曰麟德歷起來年行用之

麟德二年
九月辛卯

更改閏月制

項所司造厯以臘月為閏稽考史籍便紊舊章遂令去
歲之中晦仍見月但恐寒暑未節有爽天經用敷欽若
之懷式陳敬授之典重更尋討果差一日履端舉正屬
在於茲宜改厯惟新革非於既往可以十月為閏十月

一日甲子朔旦冬至

神功元年七月

唐大詔令集卷八十二

欽定四庫全書

唐大詔令集卷八十三

宋 宋敏求 編

政事

恩宥

曲赦涼甘等九州制

武德二年十月赦

益州夔州管内疏理囚徒制

貞觀四年二月大赦

開元三年正月德音

貞觀九年三月大赦

原減囚徒勅

宥京城罪人勅

孟夏疏決天下囚徒勅

以春令減降天下囚徒勅

恩宥

曲赦涼甘等九州制

朕恭膺寶命綏靜氓黎思俾宇內躋於仁壽而河湟之
表比罹寇賊拘逼凶醜擁隔朝風元元之民匪遑寧晏
夙興厯慮旰食忘疲重勞師旅不令討擊馭以遐筭且
事招懷而慕化之徒乘機立効兵不血刃費無遺鏃今
凶狡即夷西陲克定遠人悅附政道惟新宜播惠澤與
之更始可曲赦涼甘瓜鄯肅會蘭河廓九州自武德二
年五月十六日以前罪無輕重已發覺繫囚見徒並從

原免桀犬吠堯非無前喻棄瑕蕩穢列聖有規惡言不
順及邪謀惑計者並從洗滌一無所問

武德二年二月

武德二年十月赦

朕祇膺靈命君臨區宇承凋弊之餘拯橫流之難雖復
蠲除徭賦督課耕農安集黎元與之休息然而鯨鯢未
剪四海多虞師旅薦興事不獲已及其士卒浮惰苟求
逸樂憚於征役離其營伍因此逃竄潛匿崎嶇竊為生
資規免朝夕良由勸勵不明部署失所踈慢之責在於

朕躬琴瑟不調已云變革多墜刑網兼堪痛悼宜從寬宥許以自新其義士募力有背軍逃亡者自武德二年十月二十日以前罪無輕重皆赦除之饑寒困敝不能自存所在官司隨事賑給士非素屬難以應敵設法垂憲期於不犯自今以後有背軍鎮征役者隨即科處必無容貸宜明宣告咸使聞知

益州夔州管內疏理囚徒制

緩刑議獄哲王彝訓解網泣辜前賢茂軌朕君臨海內

撫育黎元一物乖所納隍興慮其益州道行臺及夔州
總管府衆務臻集統攝遐長囚徒禁繫其數不少或控
告未申多有冤屈或注引肆意濫及貞良致使文案稽
延訟獄繁擁念彼枉滯情深愍惻其益州管內諸州委
御史大夫無逸檢校夔州管內委趙郡公孝恭檢校所
有囚徒悉令覆察務使寬簡小大以情但有負罪逃亡
離業鄉邑無問輕重悉令歸首明加勸導務修墾植庶
使家給人足稱朕意焉

武德四年四月

貞觀四年二月大赦

天生蒸民樹之司牧莫不仰膺靈命克嗣寶圖用能永
享鴻名常為稱首朕君臨八表於今四載夙興夜寐無
忘晷刻履薄馭朽思濟黔黎惟此至誠庶幾王道上荷
蒼昊之睠下藉股肱之力宇內休平遐邇寧泰率此區
域致之仁壽憬彼犬戎為患自昔軒昊以來常為寇暴
是以隆周致涇水之師強漢受白登之辱武夫盡力於
關塞謀士極慮於廟堂征伐和親無聞上策有隋災亂

憑陵轉甚疆場之前曾無寧歲朕韜戈戟務其存養自
去歲迄今降款相繼不勞衛霍之將無待賈晁之畧單
于稽首交臂藁街名王面縛歸身夷邸襁負而至前後
不絕被髮左衽之鄉狼望龍堆之境蕭條萬里無復王
庭唯謂竄窟林穴天網雲布走伏何所大同之世諒在
茲日斯皆上玄降佑清廟威靈豈朕虛薄所能致此方
欲至仁化物宜存寬惠思與萬邦同享斯福可大赦天
下自貞觀四年二月十八日以前罪無輕重自大辟以

下見繫囚徒皆赦除之逋負官物三分免一分謀反大
逆妖言惑衆及殺期親以上尊長奴婢部曲及主官人
枉法受財不在赦例鰥寡孤獨不能自存者州縣量加
賑恤賜天下大酺五日敢以赦前事告官者以其罪罪之
貞觀九年三月大赦

天地播氣垂生育之德皇王御歷宏覆憐之仁故能財
成萬類光宅八表朕祇奉慈訓嗣守鴻業承百王之季
末屬四海之凋殘晨興夕惕無忘兆庶尅已勤躬思隆

政道欲使陰陽順序干戈載戢庶幾前列致茲刑措而山東之地頻年不稔水雨為災饑饉相屬蠢爾西戎屢擾邊境事不獲已遂勞兵車良由誠未動天德不被物興言念此撫已多慚加以澆偽尚繁刑典仍用雖復留心聽斷明慎庶獄常恐縲紲之中負寃靡訴憲網所及弗辜致罪一物有怨責深在余今歲惟暮春時屬生長助天布澤與物更新可大赦天下自貞觀九年三月十六日昧爽以前大辟罪以下皆赦除之其常赦不免者

不在赦例鰥寡孤獨不能自存者所在官司量加賑恤
開元三年正月德音

青春式序陽和布氣萬物熙熙莫不遂其性而嘉其生
也申念愚人干我王度日陷坑穽寘之網羅朕代天理
物為人父母睦言囚獄良增隱惻豈憲章之尚宥將教
導之不明欲順時令抑惟恒典兩京及天下見禁囚除
犯惡逆并造偽以前宜決一百配流嶺南及磧西諸州
其餘一切放免

原減囚徒勅

蘇頌

勅惟刑恤哉古之道也朕撫臨四海茂育萬邦思致淳
風登之壽域期畫冠而不犯故開羅而在宥念茲下愚
自抵常法時屬盛夏天其養長在物最靈惟人為貴朕
處臺榭猶有鬱蒸之毒彼居囹圄能無炎熱之憂故令
紫微黃門備加按省覽其所奏用憫於懷爰矜可恕之
罪必務惟輕之義將布寬惠宜從原減依前件

開元三
年五月

十六
日

宥京城罪人勅

五刑之用以禁奸慝三宥之設以矜愚老朕永康四海
憂在兆人俾臻大化爰措庶獄而愚妄之眚抵犯或聞
向隅可哀當寧興軫今天地既肅戒嚴在命時分具令
非罪無留載念幽犴思布生德宜崇減死之恩式明宥
過之典其京城內犯罪等人昨令按覆其中造偽頭首
及謀殺人斷死者杖一百配嶺南惡處雜斷罪死者決
一頓免死配流遠處雜犯流移者各減一年杖罪以

下並免

開元八年九月

孟夏䟽決天下囚徒勅

法以閑邪刑以助化因時而制蓋非獲已朕自臨御天下憂勞庶務以至誠感物道冀有孚以至理致和仁或由已豈欲以刑制政期於以化清刑故不用殊絕之誅每施寬大之令而遷善者衆犯法者寡斷獄十數聞諸有司然猶一夫不獲在予多媿寰宇殷廣京都浩穰繫於徽纆或未聽理逮捕斯擾糧饋為勞生業或虧何以

卒歲言念於此深用憫然況今長羸在辰耘耨斯切順
時立政在乎恤人思宏在寬之典庶無留獄之弊其天
下囚徒即令疏決其妖訛盜賊造偽頭首既深蠹時政
須量加懲罰刊名至死者各決重杖一百長流嶺南自
餘枝黨被其誣誤矜其至愚量事責罰使示懲創流以
下罪並節級處分令中書門下就大理及府州縣詳理

開元十九年
四月二十日

以春令減降天下囚徒勅

行慶施惠所以奉天緩刑恤獄所以愛人今陽和布序
草樹自榮而或入於罪隸嬰於春藁同被亭育之恩未
暢生成之施言念於此深用憫然思宏時令以哀庶獄
天下囚徒罪至死者特寬宥配隸嶺南遠惡處其犯十
惡及偽造頭首量決一百長流遠惡處流罪罰鎮三年
其徒以下罪並宜釋放其有官吏犯賊推問未了者仍
准取寔狀定名訖然後准降處分計贓一匹及與百姓
鬪有仇者並不須令却上其都委中書門下疏理京城

委留守天下諸州委長官並當日處分其責保停務之

類並宜准此

開元二十
年二月

唐大詔令集卷八十三

欽定四庫全書

唐大詔令集卷八十四

宋 宋敏求 編

政事

恩宥二

遣使往諸道疏決囚徒勅

以春令減降囚徒勅

以春令減降囚徒德音

原免囚徒德音

大歷四年大赦

大歷五年大赦

大赦京師三輔制

恩宥二

遣使徃諸道疏決囚徒勅

勅朕緬稽古訓思致人和爰發由衷之詔旨行順時之政令孟夏初吉三農在期禮先決於薄刑義必寬於輕

繫既聽其令用軫於懷雖囹圄之間少聞於冒犯澄清
之使素盡於忠公尤慮吏有煩苛人或寃滯是爽和平
之氣殊垂敬授之心其天下見繫囚徒及事發應推身
不禁者即宜差使分往諸道量事疏決及宣布時令除
犯贓賄十惡死罪不赦自犯徒以下特宜放免迴日開
奏務在欽恤以稱朕懷

開元二十
六年四月

以春令減降囚徒勅

國之用刑兼在於慎恤王者布澤亦在於乘時所以大

易陳規必議於獄周官設教遵於中典朕恭臨寶位憂
念黎元乾乾之心日慎一日況兵戎未息政役尤煩哀
此下人無忘夕惕如聞州縣之內多有累囚囹圄之間
動淹時序每切納隍之慮常懷解網之仁屬陽春和布
品彙咸達宜覃在宥之澤俾叶生成之化其天下見禁
囚徒死罪從流流罪以下一切放免其十惡反逆及造
偽頭首強盜劫殺官吏犯贓枉法等害政既甚在法難
容不在此限其諸供司及作曹非切要外並宜減省京

畿諸邑和糴一切並停其天下百姓有灼然單貧不存
濟者緣租庸先立限長行每鄉量降十丁尤恐編戶之
中懸磬者衆限數既少或未優矜其寔不支濟者宜令
每鄉量更矜放待資產稍成任依恒式以天下未寧頻
申赦令公私庶務優恤益多載覃宥過之恩庶及措刑
之美宣示中外知朕意焉

乾元二年二月

以春令減降囚徒德音

乘時布澤有國之彝訓議獄緩刑前王之茂典由是洽

其麋卵殷湯宏解網之仁順彼陽和漢后有錄囚之詔
育物施惠仰惟舊章朕纘服鴻業祇膺寶位日旰忘食
中夜求衣慮一物之失所憂四方之未乂雖身居黃屋
而志在蒼生今寇孽為虞征輸未息尤恐提戈釋耒未
有厚於人時寘棘理梧或慮盈於幽繫屬三陽啟泰萬
物遂生宜覃在宥之澤庶叶惟新之令其天下見禁囚
徒死罪降從流徒以下並宜釋放京城宜令中書門下
即分往府縣御史臺大理寺即親自按問決訖具狀聞

奏諸州府各委所由長官准此處分諸色流人及左降
官等所由類例並與量移仍委中書門下覆奏取處分
其先緣安祿山偽署三司有名應在流貶者原情議罪
負國誠深朕已捨其殊死竄於荒徼固當與衆共棄長
為匪人然皆邦家舊臣常掛纓冕使其終沒裔土永匿
慙魂不若貸以殊私俾令効節亦准例處分兼委中書
門下量輕重類例奏取處分比緣竊盜之內干戈脅從
白刃臨頸胡寧恣決所有陷於克黨苟免者多前後詔

書頻已該及其史思明將士及偽署官屬等有束身歸順並率衆來降官爵如初一無所問以城邑等降者仍別加封爵其凶黨之流亦同此例天寔臨照朕無食言王者設教務農為首今土工方起農事將興敦本勸人寔惟政要宜令天下刺史縣令各於所部親勸農桑百姓中有勤勞稼穡積其穀粟或贍於閭里或能益軍儲委所由長吏具狀奏聞當特與甄賞仍令有司第高下量酬五品以下官勲其百司及州縣興工力役不急之

務一切並停諸軍兵健應在行營有羸老病疾不任戰陣者各委節度使速揀擇放還路次州縣量加濟卹諸色番役各令所司減省營農且寇孽未平軍戎尚備厖庶之內征賦尤煩朕所以親帥公卿躬行節儉而詔書屢下蠲免蓋多至國計軍儲取給而已猶欲累加損抑以惠黔黎宜令中書門下勾當令度支使與諸供司一切減省應可蠲免每司各條件聞奏當使施行

上元二年

正月

原免囚徒德音

元首之義以人為心外有凋傷內懷慘怛罪歸於已情見乎辭伯禹深泣辜之仁漢王下哀痛之詔與理同道惟刑是恤朕志宏覆載運屬艱難思措大刑俾登壽域風以解愠時當發生國有舊章已懸書於象魏思成在宥宜釋罪於狴牢其天下見禁囚徒罪無輕重一切放免其官典犯贓法雖難恕特從寬典許以自新宜納贓放所犯罪左降官等即與量移近處諸色流人及効力

罰鎮人等並即放還其有亡官失爵亦與收叙比來兵革不息米穀未豐百姓流離至於困弊戰士暴露頗聞闕之或有結聚及有違軍令但能改過自効前事捨而不論艱虞以來多冒刑辟道存善貸屢有德音庶其最靈咸自改勵宣示中外知朕意焉

大歷四年大赦

勅至理之代先德後刑上歡心以臨下下欣然而奉上禍亂不作法令何施去聖久遠薄於教化簡書填委獄

訟繁興苛吏舞文寃人致辟思欲刷恥改行厥路無由
豈天地父母慈愛之意也朕主三靈之重託羣后之上
夕惕若厲不敢荒寧內訪卿士外咨方岳日不暇給八
年於茲而大道淳風鬱而不振四郊多壘連歲備邊師
旅在外役費尤廣賦與轉輸疲耗吾人困竭無聊窮斯
濫矣下愚闇昧不見刑網戎士在軍未習法令犯禁抵
罪其徒寔繁狴牢之間未詳其事寔吏議不決動淹夫
時序傷沮和氣屢彰咎徵此皆朕之不明教之未至上

失其道而繩下以刑敢不罪已以答災眚且人者君之
支體害之則君有所傷刑者教之輔助失之則人無所
措慮有冤濫慘然憂傷用明慎罰之典俾宏在宥之澤
其天下見禁囚死罪降從流流以下罪釋放其左降官
及流人并移隸等並與量移仍委本司即勘責送名中
書門下奏聽進止如聞州縣官比來率意恣行羈杖不
依格令致殞使斃深可哀傷頻有處分仍聞乖越自今
以後非灼然蠹害者不得輒加非理仍委觀察節度使

嚴加捉搦勿令有犯如違錄名聞奏宣示中外宜悉朕懷

大歷五年大赦

門下惟辟奉天作人父母若天垂戒於上人不安於下則修德勤政以盡至誠恤刑獄之冤抑痛問閭之疾苦招納諫諍旁求賢良允迪前烈率由茲道朕獲承宗廟之重託於王侯之上夙夜齋慄莫敢荒寧推誠以撫萬邦屈已以安百姓憂勤之至日慎一日服御之給損之又損而涉道猶淺燭理不明國經王度多有廢闕加以寇

戎驟犯軍國頻勞賦重人竭因之歲歉田荒業廢逋散
相仍每深怵悼頻有蠲降兼亦簡求良吏以惠矜人去
除奸宄用達幽枉大變風俗更張刑政冀人和之漸洽
何天青之屢彰固以朕德之寡昧化之哀薄其咎不遠
在予一人亦由郡邑之政未盡條理或貪以害物或擾
以傷農有凌弱暴寡之寃有不均失中之政人無所措
多陷刑辟蓋由教道未至豈忍以文法繩之慘然憂嗟
深自引慝雖靡草麥秋之候方斷薄刑而薰風長養之

時宜寬庶獄大決疎網與之更新其天下見禁囚徒死罪並降從流流以下並釋放内外文武官及前資官六品以下并草澤中有碩學專門茂才異等智謀經武諷諫主文者仰所在州府觀察牧宰精求表薦如所由搜揚未盡遺免林間者即宜詣闕自舉親當策試量能擢用朕每覽漢文詔書至陽和之時草木羣生之類皆有以自樂而吾百姓或陷於死亡而莫之省緬然遐想感歎增懷哀今之人又甚於昔思有贍恤安其居食觀察

節度使及刺史各宜訓勵所部使奉科條變貪官之節
激廉吏之行其清白明著政理殊尤者具以名聞必加
獎擢若冒於貨賄紊我紀綱糾察勿緩當峻刑憲其官
人犯贓經恩免罪者並宜申報中書門下及所司不得
容其却上自王室多故積有歲時皆我文武之臣中外
戮力今天下既定崇德報功與之剖符傳代不絕至於
蒞官述職各宜明慎典刑貽慶子孫永同休戚於戲武
德貞觀之間有若魏徵王珪李靖李勣房玄齡杜如晦

等扶翼大運勤勞王家尊主庇人匪躬致命咸有一德
格於皇天緬然常懷風烈尤在其後嗣沉翳特加優獎
如廟宇荒毀即宜修葺無德不報何日忘之其鰥寡悁
獨老幼貧窮不能自存者委州府縣吏取諸色官物量
事賑給仰招携戶口勸課桑農應所在州府有興功役
處非灼然急切者宜並停之五岳四瀆名山大川神明
所居風雨是主宜委中書門下分使致祭以達精誠孝
子順孫義夫節婦事跡著者特加旌表頒示中外知朕

意焉

大赦京畿三輔制


門下古者以春季之月布德行惠恤刑振乏朕親執犧
牲玉帛獲奉於上帝神祇九年於茲矣克已思理明不
能燭昆夷未叙王畧猶虞歲會三秦之師日有千金之
費悉索幣賦疲於餽軍候甸之間徵求耗竭百穀翔貴
關中小歉窮則斯濫安能懼刑因而成盜多有犯法至
於軍戎之士致使廩賜不充因之逃亡或抵邦憲事非

獲已情亦可察近以露濡之思明發有懷屬禁火之令
節方薦鮪於園寢聖祖敷祐景靈告祥先天後時載荷
嘉貺以陰以雨又助發生固宜順曲成之仁布維新之
命赦罪育物曠然滌除其京兆府及三輔並京城內諸
司諸使見禁犯死罪以下特宜釋放有犯未發覺者罪
無輕重一切放免如妄論告者以其罪罪之其官典犯
贓不在免限頃者魚朝恩夙著功勲委之戎事而徵求黎
庶空竭閭閻加之廣有貿易奪人賄利京城之內擅置

刑獄恣行恐虐幽執無辜部領師人乖於撫馭資糧刻
薄勞役煩苛惡稔釁盈日嬰沉痼念其勲舊許以優閑
今罷其兵權遂其養疾而宗社降鑒明神所殛羸瘵不
起旋至斃亡既往無追一切不問所管將士等同於事
各効辛勤是朕牙爪自致勲業並宜仍舊勿有憂懼蓋
以朕誠未感物明未知人失於授任而臻此也今則虛
懷引咎親御禁戎必加優寵以表勞績其資聖寺禁人
并追捕勘責等即宜並停然以王畿艱弊矜恤疲人蠲

稅罷徭與之休息尚恐流傭罕復貧弱未安益用憂勤
諒資約損京兆府百姓承前應欠官物等委所由勘責
寔百姓腹內者一切放免其在所由腹內者不在免放幾
內官人手力資課及府官充職掌名額稍多有所祇供
不免煩費并諸縣郵遞路次館驛諸色徵科一物以上
並委中書門下與京兆尹即計會取責色目一一商量
條件處置務令減省以息勞費其諸司使迴易一切並
停不急之務亦宜且罷農隙之後然後常式宣示中外

知朕意焉



唐大詔令集卷八十四